

**LUTRIJA BOSNE I HERCEGOVINE d.o.o.**  
**NADZORNI ODBOR**

Na osnovu člana 22. i člana 30. Zakona o igrama na sreću („Službene novine FBiH“, br. 48/15 i 60/15) i člana 22. Statuta Lutrije BiH („Službene novine FBiH“, br.95/15), Nadzorni odbor Lutrije Bosne i Hercegovine, na sjednici održanoj dana 15.12.2015. godine, donio je

**P R A V I L A**  
**IGARA NA SREĆU SUPERLOTO I JOKER**

**1. OSNOVNE ODREDBE**

**Član 1.**

Ovim pravilima reguliše se: naziv i sjedište Priređivača, naziv, vrijeme trajanja i područje primjene igara; uslovi za učestvovanje u igrama na sreću; osnovica za utvrđivanje fonda dobitaka; pojedinačna cijena igara; ukupna vrijednost uplate pojedinih kola igara; visina fonda dobitaka i vrste dobitaka; način, postupak i nadzor izvlačenja; krajnji rok uplate za učestvovanje u igrama; opis pomoćnog listića i potvrde; način objavljivanja iznosa uplate, fonda dobitaka i rezultata igara; prigovori-reklamacije; način i rok isplate dobitaka; način upoznavanja igrača sa ovim pravilima; postupak u slučaju otkazivanja izvlačenja; krajnji rok uplate za učestvovanje u igrama; porez na dobitke i prijelazne i završne odredbe.

**Član 2.**

Klasične igre na sreću SuperLOTO i Joker su igre na sreću u kojima učestvuje veći broj učesnika sa namjerom da budu jedini ili djelimični dobitnici unaprijed definisanog fonda dobitaka i u kojima se izvačenje brojeva obavlja putem bubnja.

**Član 3.**

Ova pravila predstavljaju osnov za zaključivanje ugovora o učešću u igri SuperLOTO i Joker.

Ugovor iz st. 1. ovog člana se zaključuje između Priređivača i igrača na osnovu prihvatanja opštih uslova propisanih i sadržanih u ovim pravilima, po slobodno izraženoj volji igrača, činom uplate iznosa ispisanog na izdatoj potvrdi o uplati.

Uplata u igri na sreći se dokazuje posjedovanjem potvrde o uplati (u daljem tekstu: potvrda) ili SMS poruke sa naplatnim kodom.

## **Član 4.**

Za obaveze prema prema igračima, u skladu sa odredbama ovih pravila odgovara Priređivač svim svojim sredstvima.

Za isplatu dobitaka iz stava 1. ovog člana, u skladu sa članom 15. Zakona o igrama na sreću jamči Federacija Bosne i Hercegovine.

## **2. NAZIV I SJEDIŠTE PRIREĐIVAČA**

### **Član 5.**

Priređivač igre na sreću SuperLOTO i Joker je Lutrija Bosne i Hercegovine d.o.o. Sarajevo, sa sjedištem u Sarajevu, ulica Mehmeda Spahe br. 11., registrovana kod nadležnog suda, čija je djelatnost priređivanje svih vrsta igara na sreću.

## **3. NAZIV, VRIJEME TRAJANJA I PODRUČJE PRIMJENE IGARA**

### **Član 6.**

SuperLOTO i Joker su igre na sreću koje se priređuju trajno, po kolima, dva puta sedmično i to utorkom i subotom, na području Federacije Bosne i Hercegovine i Brčko Distrikta.

### **Član 7.**

Igra na sreću SuperLOTO se sastoji od dvije igre i to: igra Loto 6/45 i igre OdaberiBoju.

Igra Loto 6/45 je brojčana igra sa izvlačenjem brojeva dobitne kombinacije putem bubnja i to po sistemu 6 izvučenih brojeva od ukupnih 45.

Igra OdaberiBoju se nastavlja na igru Loto 6/45 odabirom jedne od dvije ponuđene boje, koja se izvlači iz bubnja i ona nije obavezna.

Za obje igre se unaprijed u procentu utvrđuje visina fonda dobitaka.

Loto 6/45 je osnovna igra za igru OdaberiBoju (u daljem tekstu: osnovna igra) i igra Joker se može odigrati samo u slučaju kada je odigrana i osnovna igra.

### **Član 8.**

Igračem u igrama SuperLOTO i Joker se smatra lice koje je sa Priređivačem zaključilo ugovor iz čl. 3. ovih pravila, o čemu posjeduje potvrdu.

## **4. USLOVI ZA UČEŠĆE U IGRAMA**

### **Član 9.**

Uplate za učestvovanje u igri SuperLOTO i Joker se primaju na on-line terminalima Priređivača ili putem SMS-a.

Primanje uplate putem on-line terminala počinje popunjavanjem i čitanjem pomoćnog listića, a završava zapisom njegovog popunjenog sadržaja na serveru on-line sistema, te izdavanjem potvrde o uplati.

Uplata SuperLOTO i Joker putem on-line terminala može se vršiti i kompjuterskim odabirom brojeva (quick-pick) i boje od strane igrača.

Uplata putem SMS-a se vrše slanjem SMS poruke na određeni broj. Sadržaj SMS poruke je definisan od strane Priređivača. Sistem generiše povratni SMS koji sadrži naplatni kod.

### **Član 10.**

Pomoćni listić se popunjava čitko, tamnoplavom ili crnom hemijskom olovkom, bez ispravljanja i nepravilnog označavanja, odnosno tako da znak «x» ne pređe okvir predviđenog kvadratića i time dovede u sumnju kojem broju znak «x» pripada.

#### **4.1. Dokaz za učestvovanje u igri**

### **Član 11.**

Pomoćni listić je isključivo pomoćno sredstvo i ne može poslužiti kao dokaz za učestvovanje u igri.

Dokaz za učestvovanje u igri uplatom putem on-line sistema isključivo je potvrda o uplati.

Dokaz za učestvovanje u igri putem SMS-a je poruka sa naplatnim kodom.

### **Član 12.**

Potvrde o učestvovanju u igri iz člana 41. ovih pravila učestvuju/vrijede u kolu za koje je njen kompjuterski ispis zapisan na DVD-u.

### **Član 13.**

Potvrde koje nemaju oznake određene u članu 41. ovih pravila su nevažeće.

Uz predaju potvrde, igrač je dužan predati na uvid ličnu kartu licu koje obavlja isplatu, samo za dobitke koji podliježu porez.

Igrač u igrama SuperLOTO i Joker je dužan pri uplati provjeriti ispravnost potvrde iz člana 41. ovih pravila.

U protivnom, naknadni prigovori ne važe.

## Član 14.

Blagovremenim deponovanjem DVD-a u trezor, smatra se deponovanje koje je obavljeno prije početka izvlačenja brojeva određenog kola igre SuperLOTO i Joker.

## 5. OSNOVICA ZA UTVRĐIVANJE FONDA DOBITAKA

### Član 15.

Osnovica za utvrđivanje fonda dobitaka u klasičnim igrama na sreću SuperLOTO i Joker utvrđuje se od iznosa uplate, koju čini ukupna vrijednost uplate za učestvovanje u svakoj pojedinoj igri na sreću umanjenu za iznos od 10% na ime naknade za priređivanje igre koja se uplaćuje u budžet FBiH.

## 6. SUPERLOTO i ODABERI BOJU

### Član 16.

U svakom kolu igre SuperLOTO izvlači se šest brojeva iz grupe brojeva 1 do 45. izvučeni brojevi poredani aritmetičkim redom čine dobitnu kombinaciju za igru Loto 6/45.

Igra OdaberiBoju se nastavlja na igru Loto 6/45 i to izvlačenjem jedne od deset kuglica, od kojih su 5 (pet) "crne" boje i 5 (pet) "crvene" boje.

Prvo se izvlače kuglice sa brojevima za igru Loto 6/45. Izvlači se dobitna kombinacija od 6 brojeva iz bubnja u kojem se nalazi 45 kuglica. Nakon toga, pristupa se izvlačenju jedne kuglice u boji iz drugog bubnja u kojem se nalazi 5 crnih i 5 crvenih kuglica za igri OdaberiBoju.

### Član 17.

Uplate za učestvovanje u igri SuperLOTO se vrše na terminalima on-line sistema (putem pomoćnog listića ili kompjuterskim odabirom brojeva - quick pick) ili putem SMS-a.

Kod uplate putem terminala on-line sistema, u upotrebi se nalaze tri vrste pomoćnih listića: pomoćni listić za pojedinačno odigravanje kombinacija (obični), sistemski pomoćni listić i parcijalni sistemski pomoćni listić.

a) Na običnom pomoćnom listiću se nalazi 10 skupnih polja.

Skupno polje sačinjavaju kvadratići s odštampanim brojevima od 1 do 45.

Svaka ispravno popunjena skupina polja predstavlja pojedinačnu kombinaciju.

U pojedinačnoj kombinaciji igrač pogađa kojih će šest brojeva biti izvučeno u određenom kolu.

Pomoćni listić za pojedinačno odigravanje kombinacija se popunjava tako što se u pojedinom skupnom polju znakom «x» označava šest brojeva.

b) Na sistemskom pomoćnom listiću se nalazi samo jedno skupno polje sa brojevima od 1 do 45 i kontrolni niz od deset kvadratića sa upisanim brojevima: 7, 8, 9, 10, 11, 12, 13, 14, 15, i 16, koji označavaju koliko je brojeva označeno u skupnom polju.

Sistemski pomoćni listić se popunjava po punom sistemu tako što se u skupnom polju znakom „x“ označava 7, 8, 9, 10, 11, 12, 13, 14, 15, 16 brojeva, kao i odgovarajući broj u kvadratiću u nizu, u ovisnosti od izabrane varijante punog sistema:

Varijante punog sistema	Broj kombinacija punog sistema
7 brojeva	7
8 "	28
9 "	84
10 "	210
11 "	462
12 "	924
13 "	1.716
14 "	3.003
15 "	5.005
16 "	8.008

c) Na pomoćnom parcijalnom sistemskom listiću se nalazi samo jedno skupno polje sa brojevima od 1 do 45, kontrolni niz od petnaest kvadratića sa upisanim brojevima: 9, 10, 11, 12, 13, 14, 15, 16, 17, 18, 19, 20, 21, 22 i 23 koji označavaju koliko je brojeva označeno u skupnom polju, i dodatni niz od šest kvadratića sa upisanim postocima: 10%, 20%, 30%, 40%, 50% i 60% putem kojih se označava postotni dio izabranog punog sistema koji se uplaćuje.

Igrač učestvuje sa svim odigranim kombinacijama. Dobitnik koji ostvari bilo koji dobitak putem uplate parcijalnog sistemskog listića ostvaruje dobitak u visini označenog postotnog dijela dobitka.

Pomoćni parcijalni sistemski listić se popunjava po parcijalnom, sistemu, tako što se u skupnom polju označi 9, 10, 11, 12, 13, 14, 15, 16, 17, 18, 19, 20, 21, 22 ili 23 broja, i odgovarajući broj u kvadratiću u nizu koji označava koliko je brojeva označeno u skupnom polju. Kod uplate putem pomoćnog parcijalnog sistemskog listića igrači su obavezni da znakom "X" označe jedan od kvadratića sa upisanim postocima: 10%, 20%, 30%, 40%, 50%, 60%. Na ovaj način odabiru koliki postotni dio cijene punog sistema će uplatiti. Odabirom nekog od navedenih postotaka igrač prihvata činjenicu da će mu prilikom osvarivanja nekog dobitka pripasti samo odabrani procenat iznosa ostvarenog dobitka.

Varijante parcijalnih sistema	Broj kombinacija parcijalnih sistema
9 brojeva	84
10 "	210
11 "	462
12 "	924

13	"	1.716
14	"	3.003
15	"	5.005
16	"	8.008
17	"	12.376
18	"	18.564
19	"	27.132
20	"	38.760
21	"	54.264
22	"	74.613
23	"	100.947

Dodatnim obilježavanjem znakom "X" na bilo kojem od tri vrste pomoćnih listića, jednog od dva polja za odabir boje igrač odabira da uz svaku kombinaciju igre Loto 6/45, odigra i igru OdaberiBoju. Broj odigranih kombinacija igre OdaberiBoju na listiću jednak je broju kombinacija igre Loto 6/45 na listiću.

Izborom postotka parcijalnog sistema igrač odabire koliki postotni dio cijene za odigrani broj kombinacija igre OdaberiBoju će uplatiti, a shodno tome prihvaća i činjenicu da će mu ostvarivanjem nekog od dobitaka sa pogodnom bojom pripasti samo odgovarajući postotni dio iznosa dobitka koji bi ostvario da je odigrao identičnu varijantu punog sistema.

## 6.1. Pojedinačna cijena kombinacije

### Član 18.

Cijena jedne kombinacije za učestvovanje u igri Loto 6/45 u jednom kolu iznosi 0,50 KM po kombinaciji kod uplate kombinacija putem običnog i sistemskog listića.

Cijena jedne kombinacije kod uplate putem parcijalnog sistemskog listića iznosi odgovarajući postotni iznos od 0,50 KM.

Cijene jedne kombinacije igre LOTO 6/45 za ponuđene postotke kod parcijalnog sistemskog listića igre SuperLOTO su:

- Ukoliko je odabran postotak od 10% tada cijena jedne kombinacije igre LOTO 6/45 iznosi 0,05 KM.
- Ukoliko je odabran postotak od 20% tada cijena jedne kombinacije igre LOTO 6/45 iznosi 0,10 KM.
- Ukoliko je odabran postotak od 30% tada cijena jedne kombinacije igre LOTO 6/45 iznosi 0,15 KM.
- Ukoliko je odabran postotak od 40% tada cijena jedne kombinacije igre LOTO 6/45 iznosi 0,20 KM.

- Ukoliko je odabran postotak od 50% tada cijena jedne kombinacije igre LOTO 6/45 iznosi 0,25 KM.
- Ukoliko je odabran postotak od 60% tada cijena jedne kombinacije igre LOTO 6/45 iznosi 0,30 KM.

Cijena jedne kombinacije za učešće u igri OdaberiBoju putem običnog i sistemskog listića iznosi 0,20 KM.

Cijena jedne kombinacije igre OdaberiBoju za ponuđene postotke kod parcijalnog sistemskog listića igre SuperLOTO su:

- Ukoliko je odabran postotak od 10% tada cijena jedne kombinacije igre OdaberiBoju iznosi 0,02 KM.
- Ukoliko je odabran postotak od 20% tada cijena jedne kombinacije igre OdaberiBoju iznosi 0,04 KM.
- Ukoliko je odabran postotak od 30% tada cijena jedne kombinacije igre OdaberiBoju iznosi 0,06 KM.
- Ukoliko je odabran postotak od 40% tada cijena jedne kombinacije igre OdaberiBoju iznosi 0,08 KM.
- Ukoliko je odabran postotak od 50% tada cijena jedne kombinacije igre OdaberiBoju iznosi 0,10 KM.
- Ukoliko je odabran postotak od 60% tada cijena jedne kombinacije igre OdaberiBoju iznosi 0,12 KM.

## **6.2. Ukupna vrijednost uplate pojedinog kola igre**

### **Član 19.**

Uplatu pojedinog kola igre Loto 6/45 čini ukupna vrijednost primljenih uplata za pojedino kolo.

Uplatu pojedinog kola igre OdaberiBoju čini ukupna vrijednost primljenih uplata za pojedino kolo.

Uplate moraju biti u skladu sa zapisom na DVD-ovima koji su blagovremeno deponovani u trezor Priređivača.

## **6.3. Visina fonda, raspodjela i vrste dobitaka**

### **Član 20.**

Fond dobitaka u igrama Loto 6/45 i OdaberiBoju utvrđuje se od osnovica koje čine uplate iz člana 15. ovih pravila.

Fond dobitaka u pojedinom kolu igre Loto 6/45 iznosi 53% od osnovice utvrđene u članu 15. ovih pravila.

Fond dobitaka u pojedinom kolu igre OdaberiBoju iznosi 63% od osnovice utvrđene u članu 15. ovih pravila.

Iznos fonda dobitaka po pojedinom kolu objavljuje se u TV emisiji prije izvlačenja brojeva.

## Član 21.

U igri Loto 6/45 postoji četiri vrste dobitaka i to :

- dobitak prve vrste „šestica“ - ako je na potvrdi, u pojedinačnoj kombinaciji, pogođeno svih šest izvučenih brojeva;
- dobitak druge vrste „petica“ - ako je na potvrdi, u pojedinačnoj kombinaciji, pogođeno pet od šest izvučenih brojeva;
- dobitak treće vrste „čtvorka“ - ako je na potvrdi, u pojedinačnoj kombinaciji, pogođeno četiri od šest izvučenih brojeva;
- dobitak četvrte vrste „trojka“ - ako je na potvrdi, u pojedinačnoj kombinaciji, pogođeno tri od šest izvučenih brojeva.

U jednoj kombinaciji se ostvaruje samo jedna vrsta dobitka, tako da dobitak više vrste isključuje dobitak niže vrste.

Fond dobitaka u igri Loto 6/45 dijeli se kako slijedi:

- fond prve vrste „šestica“	- 30,00 %
- fond druge vrste „petica“	- 15,00 %
- fond treće vrste „čtvorka“	- 17,50 %
- fond četvrte vrste „trojka“	- 37,50 %

Iznos pojedinačnog dobitka utvrđuje se tako da se fond dobitaka namijenjen za tu vrstu dobitaka podijeli ukupnim brojem dobitaka te vrste.

Broj svih dobitaka ostvarenih putem uplate parcijalnih sistemskih listića učestvuje u raspodjeli dobitaka tako da se taj broj prvo pomnoži sa postotkom uz koji je listić uplaćen, te nakon toga taj dobiveni broj učestvuje u raspodjeli.

Npr. ako je ostvaren dobitak „šestica“ na parcijalnom sistemskom listiću od 10% tada u raspodjeli fonda dobitaka prve vrste taj dobitak učestvuje kao 0,1 dobitak (jedna desetina dobitka šestica).

Ako u pojedinom kolu nije utvrđen dobitak „petica“, onda se fond dobitaka za „peticu“ raspoređuje na dobitke „čtvorka“ i „trojka“ u omjeru 50% : 50% .

Ako je u pojedinom kolu broj utvrđenih dobitaka „petica“ veći od 0 a manji od 1 (parcijalni dobici), onda se ostatak fonda dobitaka za „peticu“ raspoređuje na dobitke „čtvorka“ i „trojka“ u omjeru 50% : 50% .

U igri OdaberiBoju postoji četiri vrste dobitaka za pogođenu boju, a koji se vežu uz dobitke u osnovnoj igri Loto 6/45 i to :

- dobitak prve vrste „boja za šesticu“,
- dobitak druge vrste „boja za peticu“,
- dobitak treće vrste „boja za čtvorku“,
- dobitak četvrte vrste „boja za trojku“.

U jednoj kombinaciji se ostvaruje samo jedna vrsta dobitka, tako da dobitak više vrste isključuje dobitak niže vrste.



Fond dobitaka u igri OdaberiBoju dijeli se kako slijedi:

- |                                       |           |
|---------------------------------------|-----------|
| - fond prve vrste „boja za šesticu“   | - 30,00 % |
| - fond druge vrste „boja za peticu“   | - 15,00 % |
| - fond treće vrste „boja za četvorku“ | - 17,50 % |
| - fond četvrte vrste „boja za trojku“ | - 37,50 % |

Iznos pojedinačnog dobitka jedne vrste utvrđuje se tako da se fond dobitaka namijenjen za tu vrstu dobitaka podijeli ukupnim brojem dobitaka te vrste.

Broj svih vrsta dobitaka igre OdaberiBoju ostvarenih putem uplate parcijalnih sistemskih listića učestvuje u raspodjeli dobitaka tako da se prvo taj broj pomnoži sa postotkom uz koji je listić uplaćen, te tako dobiveni broj dobitaka učestvuje u raspodjeli.

Npr. ako je ostvaren dobitak „boja za šesticu“ na parcijalnom sistemskom listiću od 10% tada u raspodjeli fonda dobitaka prve vrste „boja za šesticu“ ovaj dobitak učestvuje kao 0,1 dobitaka (jedna desetina dobitka „boja za šesticu“).

Ako u pojedinom kolu nije utvrđen dobitak „boja za peticu“, onda se fond dobitaka za „boja za peticu“ raspoređuje na dobitke „boja za četvorku“ i „boja za trojku“ u omjeru 50% : 50%.

Ako je u pojedinom kolu broj utvrđenih dobitaka „boja za peticu“ veći od 0 a manji od 1 (parcijalni dobici), onda se ostatak fonda dobitaka za „boja za peticu“ raspoređuje na dobitke „boja četvorka“ i „boja za trojku“ u omjeru 50% : 50%.

Kombinovanjem dobitaka igre Loto 6/45 i dobitaka igre OdaberiBoju formiraju se dobici koji se iskazuju u jednom iznosu kako slijedi:

- šestica (JackPot 6/45) - ako je na potvrdi, u pojedinačnoj kombinaciji, pogodeno svih šest izvučenih brojeva, a nije pogodena izvučena boja;
- šestica plus boja (SuperJackPot) - ako je na potvrdi, u pojedinačnoj kombinaciji, pogodeno svih šest izvučenih brojeva i pogodena izvučena boja;
- petica - ako je na potvrdi, u pojedinačnoj kombinaciji, pogodeno pet izvučenih brojeva, a nije pogodena izvučena boja;
- petica plus boja - ako je na potvrdi, u pojedinačnoj kombinaciji, pogodeno pet izvučenih brojeva i pogodena izvučena boja;
- četvorka - ako je na potvrdi, u pojedinačnoj kombinaciji, pogodeno četiri izvučena broja, a nije pogodena izvučena boja;
- četvorka plus boja - ako je na potvrdi, u pojedinačnoj kombinaciji, pogodeno četiri izvučena broja i pogodena izvučena boja;
- trojka - ako je na potvrdi, u pojedinačnoj kombinaciji, pogodeno tri izvučena broja, a nije pogodena izvučena boja;
- trojka plus boja - ako je na potvrdi, u pojedinačnoj kombinaciji, pogodeno tri izvučena broja i pogodena izvučena boja.

## 6.4. Super Jackpot

### Član 22.

SuperJackPot čini zbir dva JackPota i to:

- JackPot za igru Loto 6/45 i
- JackPot za igru OdaberiBoju.

Garantovani JackPot za igru Loto 6/45 (JackPot 6/45) iznosi 300.000,00 KM.

Garantovani JackPot za igru OdaberiBoju (JackPot OdaberiBoju) iznosi 200.000,00 KM.

### Član 23.

Ako u pojedinom kolu nije utvrđen dobitak „šestica“, onda se ukupan fond dobitaka za „šesticu“ prenosi u slijedeće kolo u fond za „šesticu“ (JackPot 6/45).

Ako je u pojedinom kolu broj utvrđenih dobitaka „šestica“ veći od 0 a manji od 1 (parcijalni dobitci), onda se ostatak fonda dobitaka za „šesticu“ prenosi u slijedeće kolo u fond za „šesticu“ (JackPot 6/45).

Ako u pojedinom kolu nije utvrđen dobitak „boja za šesticu“, onda se ukupan fond dobitaka za „boja za šesticu“ prenosi u slijedeće kolo u fond za „boja šesticu“ (JackPot OdabriBoju).

Ako je u pojedinom kolu broj utvrđenih dobitaka „boja za šesticu“ veći od 0 a manji od 1 (parcijalni dobitci), onda se ostatak fonda dobitaka za „boja za šesticu“ prenosi u slijedeće kolo u fond za „boja za šesticu“ (JackPot OdabriBoju).

Suma iznosa fonda za „šesticu“ i fonda „boja za šesticu“ čini fond za SuperJackPot.

Ukoliko JackPot 6/45, ili SuperJackPot budu izvučeni prije nego akumulirani fondovi dostignu garantovani iznos, razliku između akumuliranog i garantovanog JackPota nadoknađuje Priređivač iz akumulirane ili buduće akumulacije fonda neisplaćenih dobitaka.

## 6.5. Rezervni fond u igri SuperLOTO

### Član 24.

Kada se u fondu za SuperJackPot prikupi iznos od 500.000,00 KM, za kola koja slijede formira se rezervni fond za SuperLOTO, na način opisan u slijedećim stavovima ovog člana pravila.

U slučaju kada u tekućem kolu nije ostvaren dobitak SuperJackPot, fondovi formirani za to kolo dijele se na slijedeći način:

- 75% fonda dobitaka tekućeg kola za „šesticu“ u igri Loto 6/45 prenosi se u sljedeće kolo u fond za „šesticu“ (JackPot 6/45), a 25% u rezervni fond za SuperJackPot,

- 75% fonda dobitaka tekućeg kola za „boja za šesticu“ u igri OdaberiBoju prenosi se u sljedeće kolo u fond za „boja za šesticu“ (JackPot OdaberiBoju), a 25% u rezervni fond za SuperJackPot.

U slučaju kada je u tekućem kolu ostvareni broj dobitaka SuperJackPot veći od 0 a manji od 1 (parcijalni sistemi), fondovi formirani za to kolo dijele se na način opisan u prethodnom paragrafu, s tim što je osnov za raspodjelu fond dobitaka tekućeg kola za „šesticu“ i „boja za šesticu“ umanjen za iznos ostvarenih parcijalnih dobitaka.

U slučaju kada je u tekućem kolu ostvaren dobitak „šestica“, a nije ostvaren dobitak SuperJackPot, 75% fonda dobitaka tekućeg kola za „boja za šesticu“ prenosi se u sljedeće kolo u fond za „boja za šesticu“, a 25% u rezervni fond za SuperJackPot.

Kada se garantovani JackPot 6/45 obezbjeđuje u punom ili djelimičnom iznosu iz rezervnog fonda, onda se garantovani JackPot ne puni, nego se primjenjuje odredba stava 2. alineja 1. ovog člana.

Rezervni fond se koristi za formiranje garantovanog JackPota igre 6/45 i garantovanog SuperJackPota nakon što se isti izvuku.

Maksimalan iznos rezervnog fonda je 500.000,00 KM.

## Član 25.

Maksimalan iznos SuperJackPota i način njegove raspodjele mogu biti određeni odlukom Nadzornog odbora na prijedlog direktora Priređivača.

## 7. JOKER

### Član 26.

U igri Joker dobici se utvrđuju na osnovu dva izvučena broja Joker u istom kolu.

U igri Joker dobitne kombinacije u oba izvlačenja ravnopravno učestvuju u raspodjeli fonda dobitaka.

- Popunjavanjem kombinacija osnovne igre, obilježavanjem znakom "X" riječi "DA" pored riječi Joker na pomoćnom listiću. U ovom slučaju igrač učestvuje u igri joker sa jednim brojem koji je otisnut na pomoćnom listiću ispod riječi Joker.

- Popunjavanjem kombinacija osnovne igre, obilježavanjem znakom "X" riječi "DA" pored riječi Joker na pomoćnom listiću, usmenim zahtjevom prodavaču da želi odigrati dva joker broja. U ovom slučaju igrač učestvuje u igri joker sa dva broja: prvim brojem koji je otisnut na pomoćnom listiću

ispod riječi Joker i drugim brojem kojeg generiše softver slučajnim odabirom (joker quickpick).

- Popunjavanjem kombinacija osnovne igre, obilježavanjem znakom "X" riječi "DA" pored riječi Joker na pomoćnom listiću, usmenim zahtjevom prodavaču da želi odigrati tri Joker broja. U ovom slučaju igrač učestvuje u igri Joker sa tri broja: prvim brojem koji je otisnut na pomoćnom listiću ispod riječi Joker i drugim i trećim brojem koje generiše softver slučajnim odabirom (Joker quickpick).

- Popunjavanjem kombinacija osnovne igre, usmenim zahtjevom prodavaču da želi odigrati jedan, dva ili tri Joker broja. Prvi Joker broj je broj koji je otisnut na pomoćnom listiću ispod riječi Joker, a ostale generiše softver slučajnim odabirom (Joker quickpick).

- Usmenim zahtjevom prodavaču da želi odigrati quickpick osnovnu igru i da želi odigrati jedan, dva ili tri Joker broja. U ovom slučaju sve kombinacije osnovne igre i sve Joker brojeve generiše softver slučajnim odabirom.

Svaka od navedenih opcija završava uplatom.

### **7.1. Pojedinačna cijena igre**

#### **Član 27.**

Cijena za učešće u igri Joker iznosi 1.00 KM za jedan Joker broj.

#### **Član 28.**

U igri Joker može učestvovati samo listići sa uplaćenom i osnovnom igrom i Joker brojem/brojevima.

### **7.2. Fond dobitaka**

#### **Član 29.**

Fond dobitaka u pojedinom kolu za igru Joker iznosi 53% od osnovice utvrđene u članu 15. ovih pravila.

#### **Član 30.**

Novčani dobici u igri Joker su slijedeći:

##### **1. PRVA VRSTA**

- Joker, čiji fond čini 20% fonda dobitaka tekućeg kola,
- JackPot, ukoliko se u tekućem kolu ne izvuče Joker, kompletan iznos Jokera se prenosi u naredno kolo i isti čini JackPot Jokera.

Visinu početnog JackPota može utvrditi direktor, svojom odlukom. Punjenje utvrđenog JackPota će se vršiti iz redovnih uplata.

##### **2. DRUGA VRSTA**

Drugu vrstu dobitaka čini određen broj pogođenih brojeva Jokera i to:

- novčani dobitak od 1.000,00 KM za pogođenih zadnjih pet izvučenih brojeva Jokera
- novčani dobitak od 1,00 KM za pogođen /jedan/ zadnji broj izvučenih brojeva Jokera,

Nakon odbitaka gore navedenih iznosa ostatak formiranog fonda se dijeli na slijedeći način:

- za četiri pogođena broja .....25%
- za tri pogođena broja .....37,5%
- za dva pogođena broja.....37,5%

U slučaju da nema dobitaka sa pogođenih četiri broja, fond za četiri broja se prenosi u fond dobitaka sa tri i dva pogodka u omjeru 50%:50%.

Ukoliko u jednom kolu ima više dobitaka sa pet pogodaka razlika iznad 1.000,00 KM namiriće se iz fonda neisplaćenih dobitaka, odlukom direktora.

Ukoliko je vrijednost dobitka više vrste niža od vrijednosti dobitka niže vrste, ti fondovi se zbrajaju i dijele sa ukupnim brojem dobitaka više i niže vrste.

### Član 31.

Dobitak više vrste isključuje dobitak niže vrste za svaki pojedinačno uplaćeni Joker broj.

### Član 32.

Iznos pojedinačnog dobitka utvrđuje se tako da se fond dobitaka namijenjen za tu vrstu dobitaka podijeli ukupnim brojem dobitaka te vrste.

Na svakom od uplaćenih Joker brojeva može se ostvariti dobitak.

### Član 33.

Prvi Joker broj se formira od izvučenih brojeva osnovne igre, na način da se Jokera broj čine jedinice šest izvučenih brojeva osnovne igre poredanih po redoslijedu izvlačenja. /npr: ako je izvučen broj 5, računa se 5; ako je izvučen broj 27, računa se 7, itd./

Jedinice tako izvučenih brojeva, gledano s lijeva na desno, predstavljaju:

- |                         |                           |
|-------------------------|---------------------------|
| - prvo izvučeni broj    | - stotiljadicu            |
| - drugo izvučeni broj   | - desetiljadicu           |
| - treće izvučeni broj   | - hiljadicu               |
| - četvrto izvučeni broj | - stoticu                 |
| - peto izvučeni broj    | - deseticu                |
| - šesto izvučeni broj   | - jedinicu dobitnog broja |

Drugi Joker broj sa šest brojeva se formira izvlačenjem uz pomoć šest bubnjeva na način da se svaki od šest brojeva izvlači pojedinačno iz bubnja po redoslijedu s lijeva na desno iz grupe brojeva od 0 do 9. Izvučeni brojevi se upisuju s lijeva na desno.

Tehnikom izvlačenja brojeva rukuje ovlaštenu zaposlenik Priređivača.  
U slučaju kvara na bubnju, izvlačenje se obavlja ručno u skladu sa Uputstvom o radu komisije za izvlačenje brojeva.

## **8. NAČIN, POSTUPAK I NADZOR IZVLAČENJA, ODNOSNO UTVRĐIVANJA DOBITAKA**

### **8.1. Izvlačenje dobitaka**

#### **Član 34.**

Javno izvlačenje u igrama SuperLOTO i Joker nadzirat će Komisija za izvlačenje brojeva. Komisija se sastoji od tri člana od kojih je jedan član predstavnik Ministarstva finansija Federacije Bosne i Hercegovine.

Rad Komisije se utvrđuje posebnim Uputstvom koje donosi Priređivač.

Tehnikom izvlačenja brojeva rukuje ovlaštena osoba Priređivača, na osnovu Uputstva direktora.

#### **Član 35.**

U toku izvlačenja dobitaka vodi se zapisnik kojeg svi članovi Komisije potpisuju. Zapisnik mora sadržavati: mjesto, vrijeme, način izvlačenja dobitaka, uplatu u tom kolu, izvučene dobitne brojeve.

Zapisnik o izvlačenju Priređivač dostavlja Ministarstvu finansija u roku od sedam dana.

### **8.2. Utvrđivanje dobitaka**

#### **Član 36.**

Dobitke, utvrđuje Priređivač a potvrđuje Komisija za utvrđivanje dobitaka u sastavu od najmanje tri člana. Članove Komisije imenuje Priređivač.

Rad Komisije za utvrđivanje dobitaka se utvrđuje posebnim Uputstvom, koje donosi Priređivač.

## **9. KRAJNJI ROK UPLATE ZA UČESTVOVANJE U IGRAMA**

#### **Član 37.**

Uplate za učešće u igri SuperLOTO i Joker se primaju do roka koji posebnom odlukom odredi Priređivač.

O krajnjem roku za primanje uplate Priređivač je dužan upoznati zainteresovane osobe isticanjem obavijesti na svim prodajnim mjestima.

Uplata se može primati i pretplatom do osam kola unaprijed.

## 10. OPIS POMOĆNOG LISTIĆA I POTVRDE

### 10.1. Obični pomoćni listić

#### Član 38.

Obični pomoćni listić se sastoji, s lijeva na desno, od deset skupnih polja sa kvadratićima u kojima su odštampani brojevi od 1 do 45.

Iznad svakog skupnog polja je ispisan broj kombinacije.

Iznad skupnih polja, u gornjem desnom uglu je ispisan tekst Loto 6/45.

Iznad skupnih polja, u gornjem lijevom uglu je ispisan naziv Priređivača.

Desno od zadnje kombinacije nalaze se brojevi koji označavaju pretplatu za: 2,3,4,5,6,7, i 8 kola.

Ispod skupnih polja, na lijevoj strani ispisan je tekst OdaberiBoju, crno, crveno i dva kvadratića za izbor boje u igri OdaberiBoju.

Ispod skupnih polja, desno od kvadratića za izbor boje, ispisan je tekst Joker, i dva kvadratića: "da" i "ne" koja se odnose na igru Joker.

Ispod riječi Joker, ispisan je šestocifreni broj za igru Joker.

Ispod skupnih polja, u donjem desnom uglu, ispisan je broj za igru Joker u bar kod formatu.

Ispod svih navedenih polja, u donjem desnom uglu pomoćnog listića, ispisan je naziv igre SuperLOTO.

Obični pomoćni listić je štampan u crvenoj boji.

Naličje običnog pomoćnog listića se može koristiti za upute o igri i za reklamne svrhe.

### 10.2. Sistemski pomoćni listić

#### Član 39.

Sistemski pomoćni listić se sastoji iz jednog skupnog polja, u kojem su upisani brojevi od 1 do 45.

Iznad skupnog polja, u gornjem lijevom uglu je ispisan naziv Priređivača.

Desno od skupnog polja se nalazi tablica sistema u upotrebi sa naznačenim brojem odigranih kombinacija koji odgovara svakom od sistema u upotrebi.

Ispod tablice punih sistema nalazi se kontrolni niz od deset kvadratića s upisanim brojevima od 7 do 16, koji označavaju koliko je brojeva obilježeno u skupnom polju.

Desno od tablice punih sistema u upotrebi nalaze se brojevi koji označavaju pretplatu za: 2,3,4,5,6,7, i 8 kola.

U lijevom dijelu listića, ispod naziva Priređivača, ispisan je tekst Loto 6/45 i tekst sistemski listić.

Ispod skupnog polja, na lijevoj strani ispisan je tekst OdaberiBoju, crno, crveno i dva kvadratića za izbor boje u igri OdaberiBoju.

Ispod skupnog polja, desno od kvadratića za izbor boje, ispisan je tekst Joker, i dva kvadratića: "da" i "ne", koja se odnose na igru Joker.

Ispod riječi Joker, ispisan je šestocifreni broj za igru Joker.  
U donjem desnom uglu, desno od kvadratića „da“ i „ne“, ispisan je broj za igru Joker u bar kod formatu.  
Ispod svih navedenih polja, u donjem desnom uglu sistemskog pomoćnog listića, ispisan je naziv igre SuperLOTO.  
Sistemski pomoćni listić je štampan u crvenoj boji.  
Naličje sistemskog pomoćnog listića se može koristiti za upute o igri i za reklamne svrhe.

### 10.3. Parcijalni sistemski pomoćni listić

#### Član 40.

Parcijalni sistemski pomoćni listić se sastoji iz jednog skupnog polja u kojem su upisani brojevi od 1 do 45.  
Iznad skupnog polja u gornjem lijevom uglu je ispisan naziv Priređivača.  
U lijevom dijelu listića ispod naziva Priređivača je ispisan tekst LOTO 6/45 i tekst parcijalni sistemski listić.

Desno od skupnog polja se nalazi tablica parcijalnih sistema u upotrebi sa naznačenim brojem odigranih kombinacija koji odgovara svakom od sistema u upotrebi.

Ispod tablice parcijalnih sistema u upotrebi nalaze se dva niza kvadratića. U gornjem nizu je petnaest kvadratića sa upisanim brojevima od 9 do 23 koji označavaju koliko je brojeva obilježeno u skupnom polju. U donjem nizu je šest kvadratića u kojima su upisani postoci: 10%, 20%, 30%, 40%, 50% i 60% kojim se označava koliki postotak cijene svih kombinacija igrač uplaćuje, a istovremeno i putem kojih se utvrđuje sa kolikim postotkom iznosa dobitka igrač učestvuje u raspodjeli ostvarenih dobitaka.

Desno od tablice parcijalnih sistema u upotrebi nalaze se brojevi koji označavaju pretplatu za 2, 3, 4, 5, 6, 7 i 8 kola.

Ispod skupnog polja, na lijevoj strani ispisan je tekst OdaberiBoju, crno, crveno i dva kvadratića za izbor boje u igri OdaberiBoju.

Ispod niza postotaka, ispisan je tekst Joker i tri kvadratića u kojima su ispisani brojevi 1, 2, 3.

Ispod riječi Joker, ispisan je šestocifreni Joker broj.

U donjem desnom uglu, desno od kvadratića 1, 2, 3, ispisan je broj za igru Joker u bar kod formatu.

Ispod bar koda, u donjem desnom uglu parcijalnog sistemskog pomoćnog listića, ispisan je naziv igre SuperLOTO.

Parcijalni sistemski pomoćni listić je štampan je u crvenoj boji.

Naličje parcijalnog sistemskog pomoćnog listića se može koristiti za upute o igri i za reklamne svrhe.



## 10.4. Potvrda

### Član 41.

Prilikom uplate, igraču se izdaje potvrda o uplati koja gledajući odozgo prema dole, sadrži sljedeće podatke:

- „Lutrija BiH“ d.o.o. /logo i naziv Priređivača/,
- vrijeme upisa na serveru,
- tekst: „POTVRDA O UPLATI“,
- tekst: „Loto 6/45“,
- broj važećeg kola, uplatni broj (operativni broj prodavača i redni broj potvrde),
- tekst: „KOMBINACIJE“,
- odigrane kombinacije,
- odabrana boja za igru OdaberiBoju (ukoliko je uplaćena ta igra),
- odabrani postotak parcijalnog sistema (ako je odigran parcijalni sistemski listić),
- broj Jokera (ukoliko je uplaćena ta igra),
- tekst: „Iznos“, iznos u KM,
- eventualno promotivni tekst,
- broj uplatnog mjesta, datum i vrijeme uplate,
- kontrolni kod u brojčanoj i bar kod verziji.

Potvrda o uplati je ispisana na termalnoj traci na čijoj se poledini nalazi logo Lutrije BiH i izvodi iz pravila.

## 11. NAČIN OBJAVLJIVANJA IZNOSA UPLATE, FONDA DOBITAKA I REZULTATA IGARA

### Član 42.

Izvjestaj o uplati i fondu dobitaka pojedinog kola igara objavljuju se prije početka samog izvlačenja u direktnom TV prenosu.

Privremeni izvještaji o dobitcima u tekućem kolu objavljuju se nakon javnog izvlačenja a toku direktnog TV prenosa.

### Član 43.

Privremeni izvještaj koji se objavljuje u jednoj od dnevnih novina sadrži najmanje ove podatke:

- redni broj kola;
- datum izvlačenja;
- izvučene brojeve po redoslijedu izvlačenja;
- broj dobitaka i iznos dobitaka po vrstama;
- iznos primljene uplate;

- nagradni fond;
- iznos fonda određen za pojedine vrste dobitaka;
- rok za prigovore;
- ostala obavještenja koja su potrebna igračima.

## **12. PRIGOVORI - REKLAMACIJE**

### **Član 44.**

Igrač može podnijeti prigovor Komisiji za utvrđivanje dobitaka u roku od četiri dana od dana objavljivanja privremenog izvještaja, a u skladu sa Procedurom za reklamacije.

### **Član 45.**

Konačni izvještaj koji se objavljuje u jednoj od dnevnih novina sadrži najmanje ove podatke:

- redni broj kola i datum izvlačenja;
- iznos uplate i fond dobitaka;
- broj i iznos dobitaka;
- rok zastare isplate dobitka;
- uplatne brojeve potvrda opravdanih i neopravdanih prigovora;
- ispravke eventualnih greški predhodnog kola.

Konačni izvještaj potpisuje direktor Priređivača.

## **13. NAČIN I ROK ISPLATE DOBITAKA**

### **Član 46.**

Isplatu svih dobitaka obavlja Priređivač u svom sjedištu, odnosno sjedištima regiona, ili putem poslovnica banaka ovlaštenih za isplatu dobitaka.

### **Član 47.**

Pri isplati dobitka igrač je dužan predati potvrdu u ispravnom stanju.

Ispravna potvrda je ona koja sadrži sve elemente navedene u članu 41. ovih pravila.

Uz predaju potvrde igrač je dužan predati na uvid ličnu ispravu osobi koja obavlja isplatu, ako se radi o oporezivom dobitku.

### **13.1. Rok isplate**

#### **Član 48.**

Isplata dobitaka zastarijeva u roku od 30 dana od dana objavljivanja konačnog izvještaja.

## **13.2. Neisplaćeni dobici**

### **Član 49.**

Nakon isteka roka iz člana 48. ovih pravila, neisplaćeni dobici u skladu sa članom 39. Zakona o igrama na sreću FBiH se prenose u fond neisplaćenih dobitaka.

## **14. NAČIN UPOZNAVANJA IGRAČA SA OVIM PRAVILIMA**

### **Član 50.**

Ova pravila će se objaviti u jednoj od dnevnih novina.

### **Član 51.**

Ova pravila nalaze se na svim prodajnim mjestima Priređivača i web stranici Priređivača.

Priređivač je dužan omogućiti igračima upoznavanje sa ovim pravilima, odnosno dati ih na uvid.

## **15. POSTUPAK U SLUČAJU OTKAZIVANJA IZVLAČENJA**

### **Član 52.**

Termin direktnog izvlačenja može se promijeniti.

Priređivač može, saglasno sa članom 35. Zakona o igrama na sreću, iz opravdanih razloga otkazati zakazano izvlačenje.

## **16. KRAJNI ROK UPLATE ZA UČESTVOVANJE U IGRAMA**

### **Član 53.**

Uplate za učestvovanje u igrama primaju se do roka koji određuje Priređivač.

## **17. POREZ NA DOBITKE**

### **Član 54.**

Fizička lica, koja su ostvarila dobitak od igara na sreću, plaćaju porez u skladu sa Zakonom.

## **18. PRIJELAZNE I ZAVRŠNE ODREDBE**

### **Član 55.**

Priredivač je dužan čuvati zapise potvrda na DVD-u ili drugim pogodnim medijima, najmanje 2 (dvije) godine, računajući od dana održanog izvlačenja određenog kola, osim u slučajevima kada je pokrenut sudski spor radi ostvarivanja prava iz učestvovanja u igri SuperLOTO i Joker.

### **Član 56.**

Za rješavanje sporova koji proisteknu iz učestvovanja u igri SuperLOTO i Joker, mjesno i stvarno je nadležan Općinski sud u Sarajevu.

### **Član 57.**

Stupanjem na snagu ovih pravila prestaju da važe Pravila igre na sreću SuperLoto broj: 01-47-1237-2/15 od 10.07.2015. godine i Pravila igre na sreću Joker, br.01-10-2028-4-2-MM/12 od 18.12.2012. godine, br. 01-17-1379-7/13 od 05.07.2013. godine.

### **Član 58.**

Ova pravila stupaju na snagu narednog dana od dana objavljivanja u jednoj od dnevnih novina, a primjenjuju se počev od uplate za prvo kolo navedenih igara u 2016. godini.

Broj: 01-56-2242-5/15  
Dana: 15.12.2015. godine

**P R E D S J E D N I K**

**Miroslav Ćorić, s.r.**